



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՎՃՌԱԲԵԿ ԴԱՏԱՐԱՆ

ՀՀ վերաքննիչ քաղաքացիական
դատարանի որոշում
Քաղաքացիական գործ թիվ ԵԴ2/0964/02/23
Նախագահող դատավոր՝ Լ. Գրիգորյան
Դատավորներ՝ Ժ. Ասատրյան
Ն. Գաբրիելյան

Քաղաքացիական գործ թիվ **ԵԴ2/0964/02/23**
2026թ.

Ո Ր Ո Շ ՈՒ Մ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱՆՈՒՆԻՑ

Հայաստանի Հանրապետության վճռաբեկ դատարանի քաղաքացիական պալատը
(այսուհետ՝ Վճռաբեկ դատարան) հետևյալ կազմով՝

<i>նախագահող</i>	Գ. ՀԱԿՈԲՅԱՆ
<i>գեկուցող</i>	Ա. ՄԿՐՏՉՅԱՆ
	Ա. ԱԹԱԲԵԿՅԱՆ
	Ն. ՀՈՎՍԵՓՅԱՆ
	Ս. ՄԵՂՐՅԱՆ
	Վ. ՔՈՉԱՐՅԱՆ

2026 թվականի մարտի 12-ին

գրավոր ընթացակարգով քննելով ըստ «Սևան» ազգային պարկ» պետական ոչ առևտրային կազմակերպության (այսուհետ՝ Կազմակերպություն) հայցի ընդդեմ Ժևինկ Մկրտչյանի՝ գումար բռնագանձելու և պայմանագիրը լուծելու պահանջների մասին, քաղաքացիական գործով ՀՀ վերաքննիչ քաղաքացիական դատարանի 02.06.2025 թվականի «Վերաքննիչ բողոքի ընդունումը մերժելու մասին» որոշման դեմ գործին մասնակից չդարձած անձ «Վիշափ Փրոցեքթս» սահմանափակ պատասխանատվությամբ ընկերության (այսուհետ՝ Ընկերություն) բերած վճռաբեկ բողոքը,

Պ Ա Ր Զ Ե Ց

1. Գործի դատավարական նախապատմությունը

Դիմելով դատարան՝ Կազմակերպությունը պահանջել է Ժևինկ Մկրտչյանից բռնագանձել 333.518 ՀՀ դրամ, լուծել իր և Ժևինկ Մկրտչյանի միջև 05.12.2006 թվականին կնքված «Պետական սեփականություն հանդիսացող հողամասի կառուցապատման իրավունքի տրամադրման մասին»

պայմանագիրը, բռնագանձված գումարը փոխանցել Ֆինանսների նախարարության գործառնական վարչության հաշվեհամարին:

Երևան քաղաքի առաջին ատյանի ընդհանուր իրավասության քաղաքացիական դատարանի (այսուհետ՝ Դատարան) 12.02.2025 թվականի վճռով հայցը բավարարվել է:

ՀՀ վերաքննիչ քաղաքացիական դատարանի (այսուհետ՝ Վերաքննիչ դատարան) 02.06.2025 թվականի որոշմամբ Ընկերության վերաքննիչ բողոքի ընդունումը մերժվել է:

Դատավոր Ն. Գաբրիելյանը հայտնել է հատուկ կարծիք:

Սույն գործով վճռաբեկ բողոք է ներկայացրել Ընկերությունը:

Վճռաբեկ բողոքի պատասխան չի ներկայացվել:

2. Վճռաբեկ բողոքի հիմքերը, հիմնավորումները և պահանջը

Սույն վճռաբեկ բողոքը քննվում է հետևյալ հիմքերի սահմաններում ներքոհիշյալ հիմնավորումներով.

Վերաքննիչ դատարանը խախտել է Սահմանադրության 10-րդ, 61-րդ և 63-րդ հոդվածները, ՀՀ քաղաքացիական դատավարության օրենսգրքի 6-րդ, 7-րդ, 9-րդ, 360-րդ, 370-րդ ու 372-րդ հոդվածները:

Բողոք բերած անձը նշված հիմքերի առկայությունը պատճառաբանել է հետևյալ հիմնավորումներով.

Վերաքննիչ դատարանն անտեսել է, որ Ժևիկ Մկրտչյանի սնանկության գործով կառավարչի և իր միջև 09.11.2023 թվականին կնքվել է հողամասի կառուցապատման իրավունքի առուվաճառքի պայմանագիր, որով իրեն է հանձնվել սնանկ ճանաչված Ժևիկ Մկրտչյանին պատկանող անշարժ գույքի կառուցապատման իրավունքը, իսկ Դատարանի վճռով լուծվել է Կազմակերպության ու Ժևիկ Մկրտչյանի միջև 05.12.2006 թվականին կնքված «Պետական սեփականություն հանդիսացող հողամասի կառուցապատման իրավունքի տրամադրման մասին» պայմանագիրը:

Ինքը երբևէ չի ծանուցվել սույն գործի մասին, չի ներգրավվել գործի քննությանն այն դեպքում, երբ վճիռը վերաբերում է նաև իր իրավունքներին և պարտականություններին, ինչի հետևանքով զրկվել է դատական պաշտպանության իրավունքից:

Վերոգրյալի հիման վրա բողոք բերած անձը պահանջել է վերացնել Վերաքննիչ դատարանի 02.06.2025 թվականի «Վերաքննիչ բողոքի ընդունումը մերժելու մասին» որոշումը:

3. Վճռաբեկ դատարանի պատճառաբանությունները և եզրահանգումը

Վճռաբեկ դատարանն արձանագրում է, որ սույն վճռաբեկ բողոքը վարույթ ընդունելը պայմանավորված է ՀՀ քաղաքացիական դատավարության օրենսգրքի 394-րդ հոդվածի 1-ին մասի 2-րդ կետով նախատեսված հիմքի առկայությամբ՝ նույն հոդվածի 3-րդ մասի 1-ին կետի իմաստով, այն է՝ առերևույթ առկա է մարդու իրավունքների և ազատությունների հիմնարար խախտում, քանի որ բողոքարկվող դատական ակտը կայացնելիս Վերաքննիչ դատարանը թույլ է տվել ՀՀ քաղաքացիական դատավարության օրենսգրքի 360-րդ ու 372-րդ հոդվածների այնպիսի խախտում, որը խաթարել է արդարադատության բուն էությունը:

ՀՀ քաղաքացիական դատավարության օրենսգրքի 10-րդ հոդվածի 4-րդ մասի համաձայն՝ գործին մասնակից չդարձած, ինչպես նաև դատավարության մասնակից չհանդիսացող անձը դատական ակտը կարող է բողոքարկել նույն օրենսգրքով նախատեսված դեպքերում և կարգով:

ՀՀ քաղաքացիական դատավարության օրենսգրքի 360-րդ հոդվածի 1-ին մասի 3-րդ կետի համաձայն՝ առաջին ատյանի դատարանի վճիռների և նույն օրենսգրքի 361-րդ հոդվածի 1-ին մասով սահմանված որոշումների դեմ վերաքննիչ բողոք բերելու իրավունք ունեն գործին մասնակից չդարձած անձինք, **որոնց իրավունքների և պարտականությունների վերաբերյալ կայացվել է դատական ակտ:**

Նույն հոդվածի 2-րդ մասի համաձայն՝ նույն հոդվածի 1-ին մասի 3-րդ և 4-րդ կետերում նշված անձինք վերաքննիչ դատարանում օգտվում են գործին մասնակցող անձանց իրավունքներից և կրում են նրանց համար սահմանված պարտականությունները:

ՀՀ քաղաքացիական դատավարության օրենսգրքի 365-րդ հոդվածի 2-րդ մասի 10-րդ կետի համաձայն՝ դատական ակտը բոլոր դեպքերում ենթակա է բեկանման, եթե դատական ակտն ազդում է գործին մասնակից չդարձած անձանց **իրավունքների և պարտականությունների վրա**, բացառությամբ այն դեպքի, երբ դատարանը քննվող գործի մասին ծանուցել է տվյալ անձին, սակայն նա չի ցանկացել ներգրավվել գործին:

Շարադրված հոդվածներից բխում է, որ դատական ակտի դեմ վերաքննիչ բողոք ներկայացնելու իրավունք վերապահված է նաև գործին մասնակից չդարձած այն անձանց, ում իրավունքներին և (կամ) պարտականություններին առնչվում է այդ դատական ակտը: Միաժամանակ գործին մասնակից չդարձած անձանց՝ դատական ակտը բողոքարկելու իրավունքը բացարձակ չէ, և այն իրացնելու հիմնական պայմանը դատական այդ ակտի անմիջական ներգործությունն է այդ անձի իրավունքների և (կամ) պարտականությունների վրա:

ՀՀ վճռաբեկ դատարանը նախկինում կայացրած որոշմամբ արձանագրել է, որ գործին մասնակից չդարձված այն անձը, որի **իրավունքների և օրինական շահերի վերաբերյալ կայացվել է դատական ակտ**, բոլոր դեպքերում պետք է ունենա իր խախտված իրավունքների ու օրինական շահերի վերականգնման արդյունավետ միջոցների հնարավորություն: Չնայած նրան, որ գործին մասնակից չդարձած անձինք անմիջական մասնակցություն չեն ունենում տվյալ գործի քննությանը, այնուամենայնիվ տվյալ գործով կայացված դատական ակտը (եթե այն վերաբերում է նրանց իրավունքներին և պարտականություններին), **որպես կանոն, բացասաբար է անդրադառնում նրանց իրավունքների ու պարտականությունների վրա:** Այլ կերպ ասած՝ դատական ակտով ոչ միայն պետք է **անմիջականորեն շոշափվեն** այդ անձանց իրավունքները և պարտականությունները, այլև **խոչընդոտներ ստեղծվեն** նրանց սուբյեկտիվ իրավունքների իրացման կամ պարտականության պատշաճ կատարման համար (*տե՛ս «ԲԱԳՐԵՎԱՆՅԱՆ ՂՈՂԱՆՋ» ՍՊԸ-ն ընդդեմ Պաշտպանության նախարարության թիվ ԵԴ/28163/02/18 քաղաքացիական գործով ՀՀ վճռաբեկ դատարանի 17.06.2021 թվականի որոշումը*):

Նախկինում կայացրած մեկ այլ որոշմամբ ՀՀ վճռաբեկ դատարանը գտել է, որ գործին մասնակից չդարձված անձանց իրավունքների և պարտականությունների վերաբերյալ կայացրած դատական ակտի առկայությունը կապված է կողմերի իրավահավասարության ու մրցակցության սկզբունքների խախտման հետ, իսկ նման խախտմամբ գործի քննության իրականացման արդյունքում կայացված դատական ակտն էլ չի կարող լինել օրինական և հիմնավորված (*տե՛ս*

Աննա և Գալինա Խաչատրյաններն ընդդեմ Ռոստոմ Բուռնազյանի ու Ռոստոմ Բուռնազյանն ընդդեմ Աննա և Գալինա Խաչատրյանների թիվ ԵԿԴ/0408/02/09 քաղաքացիական գործով ՀՀ վճռաբեկ դատարանի 27.05.2022 թվականի որոշումը):

ՀՀ վճռաբեկ դատարանը նշել է նաև, որ վերաքննիչ դատարանը յուրաքանչյուր դեպքում գործին մասնակից չդարձված անձի կողմից ներկայացված բողոքը վարույթ ընդունելու հարցը լուծելիս պետք է պարզի՝ արդյոք բողոքին կից ներկայացված ապացույցներով հիմնավորվում է, որ վիճարկվող դատական ակտն **առերևույթ** կարող է վերաբերել վերջինիս իրավունքներին և պարտականություններին:

Ինչ վերաբերում է անձի **իրավունքների և պարտականությունների վերաբերյալ դատական ակտ կայացված լինել կամ չլինելու հարցին**, ապա այն **պետք է գնահատման առարկա դարձվի և պարզվի ՀՀ վերաքննիչ դատարանում՝ գործի քննության փուլում** (տե՛ս Գառնիկ Կուրդինյանը և Մանյա Ալոյանն ընդդեմ Անահիտ ու Միքայել Կուրդինյանների թիվ ԵԱԲԴ/2573/02/11 քաղաքացիական գործով ՀՀ վճռաբեկ դատարանի 27.12.2013 թվականի որոշումը):

ՀՀ վճռաբեկ դատարանն արձանագրել է, որ օրենսդիրն ի թիվս այլնի ՀՀ քաղաքացիական դատավարության օրենսգրքի 365-րդ հոդվածի 2-րդ մասով, որպես դատական ակտի պարտադիր բեկանման հիմք սահմանել է նաև այն դատական ակտի բեկանումը, որն ազդել է գործին մասնակից չդարձած անձանց իրավունքների և պարտականությունների վրա: ՀՀ քաղաքացիական դատավարության օրենսգրքի 365-րդ հոդվածի 2-րդ մասով նախատեսված խախտումների բնույթն այնպիսին է, որ դրանք կարող են վերացվել բացառապես դատական ակտի բեկանումից հետո՝ գործի ամբողջ ծավալով նոր քննություն իրականացվելու դեպքում: Նշված պատճառաբանությամբ էլ վերաքննիչ դատարանի կողմից վճռի բեկանման անվերապահ որևէ հիմքի առկայությունը հաստատված լինելու դեպքում կիրառման է ենթակա դատական ակտը բեկանելու և գործը համապատասխան ստորադաս դատարան նոր քննության ուղարկելու լիազորությունը (տե՛ս «ԲԱԳՐԵՎԱՆՅԱՆ ՂՈՂԱՆՋ» ՍՊԸ-ն ընդդեմ Պաշտպանության նախարարության թիվ ԵԴ/28163/02/18 քաղաքացիական գործով ՀՀ վճռաբեկ դատարանի 17.06.2021 թվականի որոշումը):

ՀՀ վճռաբեկ դատարանն արձանագրել է նաև, որ գործին մասնակից չդարձված անձանց կողմից իրենց իրավունքներին վերաբերող՝ օրինական ուժի մեջ մտած դատական ակտը բողոքարկելու դեպքում դրա վերանայման վարույթում այն կարող է բեկանվել միայն այն մասով, որով այդ դատական ակտը առնչվում է նշված անձանց իրավունքներին և պարտականություններին (տե՛ս «Հայր և որդի Ադամյաններ» ՍՊԸ-ն ընդդեմ «Հինգերորդ Աստղ» ՍՊԸ-ի ու «Հինգերորդ Աստղ» ՍՊԸ-ն ընդդեմ «Հայր և որդի Ադամյաններ» ՍՊԸ-ի թիվ ԵԱԴԴ/0199/02/11 քաղաքացիական գործով ՀՀ վճռաբեկ դատարանի 17.07.2015 թվականի որոշումը):

Վերոգրյալ իրավական դիրքորոշումների կիրառումը սույն գործի փաստերի նկատմամբ

Դիմելով դատարան՝ Կազմակերպությունը պահանջել է Ժևիկ Մկրտչյանից բռնագանձել 333.518 ՀՀ դրամ, լուծել իր և Ժևիկ Մկրտչյանի միջև 05.12.2006 թվականին կնքված «Պետական սեփականություն հանդիսացող հողամասի կառուցապատման իրավունքի

տրամադրման մասին» պայմանագիրը, բռնագանձված գումարը փոխանցել Ֆինանսների նախարարության գործառնական վարչության հաշվեհամարին:

Որպես հայցի փաստական հիմնավորում Կազմակերպությունը հայտնել է, որ Ժևիկ Մկրտչյանը, խախտելով իրենց միջև 05.12.2006 թվականին կնքված «Պետական սեփականություն հանդիսացող հողամասի կառուցապատման իրավունքի տրամադրման մասին» պայմանագիրը (այսուհետ՝ Պայմանագիր), չի վճարել հողամասի վարձավճարը, ինչի հետևանքով վերջինիս պարտքը կազմում է 333.518 ՀՀ դրամ, որից 286.808 ՀՀ դրամը՝ վարձավճարն է, իսկ 46.710 ՀՀ դրամը՝ հաշվարկված տույժը (**հատոր 1-ին, գ.թ. 4-6**):

Կազմակերպության՝ որպես սեփականատիրոջ և Ժևիկ Մկրտչյանի՝ որպես կառուցապատման իրավունք ունեցող անձի միջև կնքված Պայմանագրի՝

- 1.1-ին կետի համաձայն՝ սեփականատերը պարտավոր է վճարի դիմաց կառուցապատման իրավունք ունեցող անձին տրամադրել հողամաս, ընդհանուր մակերեսը՝ 6.000 քմ,

- 4.4.1-ին կետի համաձայն՝ կառուցապատման իրավունք ունեցող անձը պարտավոր է ժամանակին վճարել կառուցապատման իրավունքի համար վճարը,

- 5.1-ին կետի համաձայն՝ կառուցապատման իրավունքի տարեկան վճարը կազմում է 60.000 ՀՀ դրամ,

- 6.2-րդ կետի համաձայն՝ կառուցապատման իրավունք ունեցող անձի կողմից Պայմանագրով սահմանված ժամկետներում վճարումներ չկատարելու դեպքում կետանցի յուրաքանչյուր օրվա համար վճարում է տույժ՝ տարեկան վճարի գումարի 0.05 տոկոսի չափով,

- 8.1.3-րդ կետի համաձայն՝ սեփականատիրոջ պահանջով կառուցապատման իրավունքի պայմանագիրը կարող է դատարանով վաղաժամկետ լուծվել, եթե կառուցապատման իրավունք ունեցող անձը՝ Պայմանագրով սահմանված վճարման ժամկետը լրանալուց հետո 2 անգամից ավել չի կատարել վճարումը (**հատոր 1-ին, գ.թ. 36, 37**):

Պայմանագրից ծագող իրավունքը (գործում առկա վկայականի համաձայն՝ Ժևիկ Մկրտչյանի սեփականության օգտագործման) ենթարկվել է պետական գրանցման (**հատոր 1-ին, գ.թ. 38**):

Կազմակերպության կողմից տրված տեղեկանքի համաձայն՝ վարձակալ Ժևիկ Մկրտչյանի պարտքը 06.04.2023 թվականի դրությամբ կազմում է 333.518 ՀՀ դրամ (**հատոր 1-ին, գ.թ. 40**):

Դատարանը, արձանագրելով, որ «Պատասխանողը խախտել է 05.12.2006 թվականին կնքված «Պետական սեփականություն հանդիսացող հողամասի կառուցապատման իրավունքի տրամադրման մասին» թիվ 620 պայմանագիրը 8.1.3-րդ կետով սահմանված պահանջը, այն է՝ կառուցապատման իրավունք ունեցող անձը նույն պայմանագրով սահմանված վճարման ժամկետը լրանալուց հետո երկու անգամից ավելի չի կատարել վճարումը: Հետևաբար, առկա են 05.12.2006 թվականին կնքված պայմանագրի 8.1.3-րդ կետի և պայմանագրի կողմի՝ «Սևան ազգային պարկ» ՊՈԱԿ-ի նախաձեռնությամբ դատական կարգով հողամասի կառուցապատման իրավունքի տրամադրման մասին պայմանագիրը վաղաժամկետ լուծելու համար անհրաժեշտ իրավական և փաստական հիմքերը», 12.02.2025 թվականին վճռել է Կազմակերպության հայցը բավարարել:

Դատարանի 12.02.2025 թվականի վճռի դեմ վերաքննիչ բողոք է ներկայացրել գործին մասնակից չդարձած անձ Ընկերությունը՝ պատճառաբանելով, որ Սնանկության դատարանի

26.03.2020 թվականի վճռով Ժևիկ Մկրտչյանը ճանաչվել է սնանկ (սնանկության գործ թիվ ՍնԴ/1889/04/19), սնանկության գործով կառավարիչն ու ինքը սույն քաղաքացիական գործի քննությանը մասնակից չեն դարձվել, մինչդեռ Դատարանի 12.02.2025 թվականի վճիռն առնչվում է իր իրավունքներին և պարտականություններին, քանի որ Ժևիկ Մկրտչյանի սնանկության գործով կառավարիչ Սոնա Ավագյանի ու իր միջև 09.11.2023 թվականին կնքվել է «Հողամասի կառուցապատման իրավունքի առուվաճառքի» պայմանագիր, որով կառավարիչն իրեն է հանձնել Պայմանագրով նախատեսված կառուցապատման իրավունքը:

Գործին մասնակից չդարձած անձ Ընկերությունը վերաքննիչ բողոքին կցել է նաև՝

- Պայմանագրի պատճենը,

- Ժևիկ Մկրտչյանի սնանկության գործով կառավարիչ Սոնա Ավագյանի և իր միջև 09.11.2023 թվականին կնքված «Հողամասի կառուցապատման իրավունքի առուվաճառքի» պայմանագրի պատճենը **(հատոր 2-րդ, գ.թ. 69-77):**

09.11.2023 թվականին Ժևիկ Մկրտչյանի սնանկության գործով կառավարիչ Սոնա Ավագյանի՝ որպես վաճառողի և Ընկերության՝ որպես գնորդի միջև կնքված «Հողամասի կառուցապատման իրավունքի առուվաճառքի» պայմանագրի՝

- 1-ին կետի համաձայն՝ վաճառողը, ղեկավարվելով Սնանկության դատարանի թիվ ՍնԴ/1889/04/19 սնանկության գործով գույքի վաճառքը թույլատրելու մասին որոշմամբ և 04.07.2023 թվականի «աճուրդների արդյունքների մասին» արձանագրությամբ, գնորդին հանձնում է Ժևիկ Մկրտչյանին պատկանող (...) անշարժ գույքի կառուցապատման իրավունքը: Օտարվող կառուցապատման իրավունքը բաղկացած է 0.6 հա մակերեսով հողամասի կառուցապատման իրավունքից՝ 05.12.2006 թվականին վավերացված Պայմանագրով նախատեսված պայմաններով, որը սահմանված է 05.12.2006 թվականից մինչև 05.12.2031 թվականը,

- 2-րդ կետի համաձայն՝ գույքը գտնվում է արգելանքի տակ, (...) կիրառման հիմք հանդիսացող փաստաթղթերը՝ Սնանկության դատարանի վճիռ՝ թիվ ՍնԴ/1889/04/19 սնանկության գործով: (...) Համաձայն Սնանկության դատարանի թիվ ՍնԴ/1889/04/19 սնանկության գործով 19.07.2023 թվականի՝ գույքի նկատմամբ կիրառված սահմանափակումները և արգելանքները վերացնելու մասին որոշման՝ վերացվել է Ժևիկ Մկրտչյանին սեփականության իրավունքով պատկանող (...) անշարժ գույքի նկատմամբ հողամասի կառուցապատման իրավունքի (մինչև 05.12.2031 թվականը) նկատմամբ կիրառված արգելանքներն ու սահմանափակումները **(հատոր 2-րդ, գ.թ. 77):**

Վերաքննիչ դատարանը, արձանագրելով, որ «բողոք բերած անձի կողմից վերը վկայակոչված հանգամանքներով չի հիմնավորվում այն հանգամանքը, որ բողոքարկվող վճիռն առնչվում է Ընկերության իրավունքներին և պարտականություններին, քանի որ բողոքում չեն նշվել վճռի հետևանքով Ընկերության համար ծագած պարտավորությունները կամ Ընկերության այն իրավունքները, որոնց վերաբերվում է բողոքարկվող դատական ակտը: Մասնավորապես, բողոք բերած անձը չի հանդիսանում 05.12.2006 թվականին կնքված «Պեղական սեփականություն հանդիսացող հողամասի կառուցապատման իրավունքի տրամադրման մասին» թիվ 620 պայմանագրի կողմ, գումարի բռնագանձման բավարարված պահանջը նույնպես վերջինիս համար որևէ պարտականություն չի սահմանում, դատական ակտով որևէ կերպ չեն

շոշափվել Ընկերության իրավունքներն ու օրինական շահերը: Ինչ վերաբերում է Պատասխանողին փոխանցված կառուցապատման իրավունքը վերջինիս կողմից առուվաճառքի պայմանագրի հիման վրա Ընկերությանը փոխանցված լինելուն, ապա Վերաքննիչ դատարանն արձանագրում է, որ բողոք բերած անձի նշվածի վերաբերյալ իրավունքները դեռևս չեն ծագել, քանի որ այդպիսիք կարող են ծագել միայն պետական գրանցում ստանալու պահից», Ընկերության բերած վերաքննիչ բողոքի ընդունումը մերժել է:

Մինչդեռ Վճռաբեկ դատարանն արձանագրում է, որ Դատարանի 12.02.2025 թվականի վճռով բավարարվել է այն պայմանագիրը լուծելու և դրա հիման վրա գումար բռնագանձելու պահանջը, որի հիման վրա սնանկության վարույթի շրջանակներում կազմակերպված աճուրդով Ժնիկ Մկրտչյանին պատկանող կառուցապատման իրավունքը վաճառվել է Ընկերությանը՝ կնքելով նշված իրավունքի օտարման վերաբերյալ առուվաճառքի պայմանագիր: Ընդ որում, նշված առուվաճառքի պայմանագիրը կնքվել է, և Ժնիկ Մկրտչյանին պատկանող գույքային իրավունքն օտարվել է Պայմանագրով նախատեսված պայմաններով:

Այսինքն՝ առկա է գույքային իրավունք (առնվազն սեփականության իրավունք ձեռք բերելու օրինական ակնկալիք), որը ծագել է 09.11.2023 թվականին կնքված «Հողամասի կառուցապատման իրավունքի առուվաճառքի» պայմանագրից և որի առկայության պայմաններում ստորադաս դատարանների կողմից Ընկերությանը գործին մասնակից չդարձնելը կարող էր հանգեցնել դատավարական իրավունքի նորմի խախտման:

Նման պայմաններում Վերաքննիչ դատարանի այն հետևությանը, որ «բողոք բերած անձի նշվածի վերաբերյալ իրավունքները դեռևս չեն ծագել, քանի որ այդպիսիք կարող են ծագել միայն պետական գրանցում ստանալու պահից», Վճռաբեկ դատարանը գնահատում է չհիմնավորված և գործի փաստական հանգամանքներից չբխող:

Վճռաբեկ դատարանն արձանագրում է, որ Դատարանի 12.02.2025 թվականի վճիռն **առերևույթ** առնչվում է Ընկերության իրավունքներին և պարտականություններին, ուստի Ընկերությունը՝ որպես գործին մասնակից չդարձած անձ, պետք է ունենա իրավական հնարավորություն՝ բողոքարկելու նշված դատական ակտը:

Ամփոփելով վերոգրյալը՝ Վճռաբեկ դատարանը եզրահանգում է, որ Վերաքննիչ դատարանը, կայացնելով Ընկերության վերաքննիչ բողոքի ընդունումը մերժելու մասին որոշում, սահմանափակել է վերջինիս բողոքարկման իրավունքի իրացման հնարավորությունը՝ նրան զրկելով վերադաս դատարանի մատչելիության իրավունքից: Այսինքն՝ Վերաքննիչ դատարանը թույլ է տվել ՀՀ քաղաքացիական դատավարության օրենսգրքի 360-րդ և 372-րդ հոդվածների խախտում, որը խաթարել է արդարադատության բուն էությունը:

Այսպիսով, վճռաբեկ բողոքի հիմքի առկայությունը Վճռաբեկ դատարանը դիտում է բավարար՝ ՀՀ քաղաքացիական դատավարության օրենսգրքի 365-րդ հոդվածի 1-ին մասի և 390-րդ հոդվածի 3-րդ մասի ուժով Վերաքննիչ դատարանի 02.06.2025 թվականի «Վերաքննիչ բողոքի ընդունումը մերժելու մասին» որոշումը վերացնելու համար: Ընդ որում, նշված որոշումը վերացվելու դեպքում Ընկերության ներկայացրած վերաքննիչ բողոքը, ՀՀ քաղաքացիական դատավարության օրենսգրքի 372-րդ հոդվածի 5-րդ մասի համաձայն, ենթակա է վարույթ ընդունման, եթե բացակայեն վերաքննիչ բողոքի ընդունումը մերժելու այլ հիմքեր կամ վերաքննիչ բողոքը վերադարձնելու հիմքեր:

Ելնելով վերոգրյալից և ղեկավարվելով ՀՀ քաղաքացիական դատավարության օրենսգրքի 405-րդ, 406-րդ ու 408-րդ հոդվածներով՝ Վճռաբեկ դատարանը

Ո Ր Ո Շ Ե Ց

1. Վճռաբեկ բողոքը բավարարել: Վերացնել ՀՀ վերաքննիչ քաղաքացիական դատարանի 02.06.2025 թվականի «Վերաքննիչ բողոքի ընդունումը մերժելու մասին» որոշումը:

2. Որոշումն օրինական ուժի մեջ է մտնում կայացման պահից, վերջնական է և ենթակա չէ բողոքարկման:

Նախագահող _____ **Գ. ՀԱԿՈՐՅԱՆ**

Զեկուցող _____ **Ա. ՄԿՐՏՉՅԱՆ**

_____ **Ա. ԱԹԱԲԵԿՅԱՆ**

_____ **Ն. ՀՈՎՍԵՓՅԱՆ**

_____ **Ս. ՄԵՂՐՅԱՆ**

_____ **Վ. ՔՈՉԱՐՅԱՆ**